

Moaña

O xuíz avala a ordenanza de antenas, pero anula as distancias de protección

O Concello de Moaña impuxo unha separación de cen metros a centros de ensino e sanitarios

La Voz - 18/2/2009

O Tribunal Superior de Xustiza de Galicia rexeitou a pretensión de Telefónica Móviles e Vodafone de anular a práctica totalidade da ordenanza de antenas de telefonía aprobada polo Concello de Moaña en 2005, aínda que aceptou algúns dos argumentos de ambas as operadoras en canto á distancia de protección imposta, así como a obriga de concertar un seguro de responsabilidade específico para as instalacións no municipio.

A sentenza sobre o contencioso exposto por Vodafone anula un apartado do artigo 35 da ordenanza, que establece a posibilidade de ordenar o cambio de localización dunha instalación de telefonía por razóns de interese público sen ningún tipo de indemnización. Rexeita, con todo, as demais peticións da empresa.

O Concello, segundo indica o xuíz, non só ten dereito a regular a actividade, senón tamén a esixir, antes de outorgar licenza para colocar unha antena, que a operadora presente un plan de implantación, é dicir, un informe das instalacións que xa ten colocadas e as previsións futuras.

Tamén outorga a razón ao Concello na súa esixencia de que as compañías acheguen a autorización da comunidade de propietarios cando soliciten permiso para colocar unha antena nun edificio, así como a conveniencia de que compartan as distintas operadoras a mesma instalación.

O fallo sobre o contencioso presentado por Telefónica Móviles significa un revés para as pretensións do Concello moañés, xa que anula os artigos que establecen as distancias de protección. A ordenanza obriga a separar unha antena a 100 metros de colexios e centros sanitarios e a 10 metros das vivendas. Os maxistrados consideran que o Concello non pode impor estas restricións xa que non se contemplan na normativa estatal.

O concelleiro de Medio Ambiente, Daniel Rodas compara os intereses do Concello e os das operadoras como a loita de «David contra Goliat». Anuncia a intención do goberno local de recorrer a sentenza.

Sancións

A instalación máis polémica é a que existe nas Barxas, que comparten varias operadoras. Non contaba con licenza de actividade. As operadoras cuestionaban tamén o dereito do Concello a esixila, pero o Tribunal Superior entende que si o ten.

Na actualidade, a solicitude está en trámite. Rodas di que se verá se é ou non legalizable. Namentres, o Concello impuxo dúas sancións de mil euros a cada unha das compañías que comparten esta instalación.